

Na osnovu člana 109., 113. i 161. Poslovnika Skupštine Bosansko-podrinjskog kantona Goražde („Službene novine Bosansko-podrinjskog kantona Goražde“, broj 3/18 i 6/19), Skupštine Bosansko-podrinjskog kantona Goražde, na 8. redovnoj sjednici, održanoj 18. oktobra 2023. godine, **donosi**:

DEKLARACIJU SKUPŠTINE BOSANSKO-PODRINJSKOG KANTONA GORAŽDE POVODOM STRAVIČNIH ZLOČINA PROTIV ČOVJEČNOSTI U PALESTINI

Kao jedna od sigurnih zona Ujedinjenih nacija, proglašena Rezolucijom 824 Vijeća sigurnosti Ujedinjenih nacija, u kojoj je poginulo, na razne načine ubijeno, tjelesno i mentalno ranjeno i u raznim okolnostima umrlo više hiljada ljudi - među kojima i stotine djece, kao sredina koja je bila u opsadi 1336 dana;

Kao narod čija su sjećanja još uvijek svježja, a rane još uvijek nisu zarasle, ne možemo i ne smijemo štititi i ostati nijemi na strašnu agresiju i napade izraelske vojske, ne protiv stanovnika najvećeg zatvora na svijetu, pojasa Gaze, već protiv cijelog čovječanstva, jer onaj koji ubije jednu nevinu osobu, kao da je ubio cijeli svijet. A sinoć je svijet ubijen preko 600 puta;

Stoga najoštrije osuđujemo napad na Gazu i bombardovanje bolnice Al-Ahil Al-Arabi i u njoj ubijenih najmanje 600 civila, većinom žena i djece, koje se smatra jasnim kršenjem međunarodnog prava i odredbi međunarodnog legitimiteta i čovječnosti, te moramo ustati i glasno osuditi genocid i zločine protiv čovječnosti, koji se dešavaju pred očima cijelog svijeta;

Ne smijemo i ne želimo biti dio licemjernog svijeta za koje je život jednih vrijedniji od života drugih, za koje je pravo jednih da brane svoje živote veće od prava nekih drugih koji godinama trpe zločine, zlodjela i zulum svake vrste;

Danas, više nego ikada, bitno je iz Goražda i Bosansko-podrinjskog kantona Goražde poslati jasnu, glasnu i nedvosmislenu poruku, da mi, čije su rane i sjećanja na agresiju, blokadu, opsadu, granatiranje škola i bolnica još uvijek svježja, apelujemo na deeskalaciju nasilja i zaštitu nedužnih civila, te pozivamo sve one koji su u poziciji da zaustave nasilje i okrenu se postizanju mirovnog rješenja;

Izražavamo najdublje žaljenje za smrću civila, napadi na bolnice, potpuna blokada Gaze uključujući uskraćivanje vode i hrane, zahtjev za iseljavanjem milion civila, te nemogućnost dostave humanitarne pomoći predstavljaju kršenje međunarodnog humanitarnog prava i nisu ništa do zločini protiv čovječnosti koje sistemski provodi Izraelsko-cionistički režim. Takvi potpuno neselektivni napadi na civile, uskraćivanje vode i hrane i napadi na bolnice u nama bude slike najmračnijih dana iz perioda agresije na Bosnu i Hercegovinu i opsade bosanskohercegovačkih gradova;

Duboko se suosjećajući sa ubijenim, nadamo se ozdravljenju ranjenih i okončanju napada na Gazu;

Osuđujući nasilje, pozivamo Vijeće ministara BiH da povuče svoje prethodne izjave podrške Izraelu, a posebno pozivamo Ministarstvo vanjskih poslova Bosne i

Hercegovine, da odmah i bez odlaganja, obavijesti sva relevantna tijela, kako bi jasno i nedvosmisleno prenijelo stav Bosne i Hercegovine po ovom pitanju, te pozvalo sve bitne međunarodne faktore da, sa ciljem uspostavljanja trajnog mira, osiguraju primjenu Rezolucije Ujedinjenih nacija i Sporazuma iz Osla, kojima se predviđa rješenje o dvije države Palestini i Izraelu sa Istočnim Jerusalemom kao glavnim gradom Palestine.

Broj: 01-37-696/23
18. oktobra 2023. godine
G O R A Ź D E



Muradif Kanlić